

氏族典第三百卷

臧姓部彙考

鄭樵通志 以邑爲氏

魯邑

臧氏姬姓魯孝公之子彊食邑於臧因以爲氏隱公五年臧僖伯諫觀魚桓公二年臧哀伯諫納郕鼎襄公二十四年臧紇爲季氏廢長立庶被孟氏所譖斬鹿門之關以出奔邾乃立臧爲致防而奔齊漢有燕王臧荼城陽王太傅臧璋後漢二十八將城門校尉臧宮望出東海

廖用賢尙友錄 臧姓

臧東海商音

臧姓部列傳

周 臧僖伯

按左傳隱公五年春公將如棠觀魚者臧僖伯諫曰凡物不足以講大事其材不足以備器用則君不舉焉君將納民于軌物者也故講事以度軌量謂之軌取材以章物采謂之物不軌不物謂之亂

政亂政亟行所以敗也故春蒐夏苗秋獮冬狩皆於農隙以講事也三年而治兵入而振旅歸而飲至以數軍實昭文章明貴賤辨等列順少長習威儀也鳥獸之肉不登于俎皮革齒牙骨角毛羽不登于器則公不射古之制也若夫山林川澤之寶器用之資皂隸之事官司之守非君所及也公曰吾將略地焉遂往陳魚而觀之僖伯稱疾不從書曰公矢魚于棠非禮也且言遠地也冬十二月辛巳臧僖伯卒公曰叔父有憾于寡人寡人弗敢忘葬之加一等

按僖伯名彊字子臧據以王父字爲氏之說則公子彊尙未賜氏至其孫

瓶始得以王父字爲臧氏今因左傳臧僖伯臧哀伯之稱故并載之或如無駭之例及身賜氏未可知也

臧孫達

按左傳桓公二年夏四月取郕大鼎于宋戊申納于太廟非禮也臧哀伯諫曰君人者將昭德塞違以臨照百官猶懼或失之故昭令德以示子孫是以清廟茅屋大路越席大羹不致粢食不鑿昭其儉也衮冕黻珽帶裳幅舄衡紱紃纒昭其度也藻率鞞鞞屬游纓昭其數也火龍黼黻昭其文也五色比象昭其物也錫鑾和鈴昭其聲也三辰旂旗昭其明也夫德儉而有度登降有數文物以紀之聲明以發之以臨照百官百官于是乎戒懼而不敢易紀律今滅德立違而實其賂器于太廟以

明示百官百官象之其又何誅焉國家之敗由官邪也官之失德寵賂章也鄧鼎在廟章孰甚焉武王克商遷九鼎于維維邑義士猶或非之而況將昭違亂之賂器于太廟其若之何公不聽周內史聞之曰臧孫達其有後于魯乎君違不忘諫之以德

臧孫瓶

按春秋臣傳伯氏瓶臧哀伯之子

臧孫辰

按春秋臣傳臧文仲魯大夫臧孫辰也臧哀伯之孫伯氏瓶之子莊公二十八年冬飢文仲嘗于公曰國病矣君盍以名器請糴于齊公曰誰使對曰國有飢饉卿出告糴古之制也辰也備卿請如齊公使往文仲以鬯圭與玉聲如齊告糴齊人歸其玉而與之糴宋襄公欲合諸侯文仲曰以欲從人則可以人從欲鮮濟僖公二十一年夏大旱公欲焚巫尪文仲曰非旱備也修城郭貶食省用務穡勸分此其務也巫尪何爲天欲殺之則如無生若能爲旱焚之滋甚公從之是歲也飢而不害二十二年公伐邾公卑邾不設備文仲曰國無小不可易也蠶蠶有毒而況國乎溫之會晉人執衛成公

文仲言于公曰夫諸侯之患諸侯恤之所以訓民也君盍請衛君以示親諸侯公悅乃免衛侯衛侯聞臧文仲之爲也使納賂焉辭曰外臣之言不越境不敢及君三十一年春取濟西田分曹地使文仲往宿於重館重館人告曰不速行無及也從之分曹地自洮以南來傳于濟盡曹地也歸爲之請曰地之多也重館人之力也臣聞之善有章雖賤必賞也惡有釁雖貴必罰也今一言而辟境其章大矣請賞之乃出而爵之文公二年秋八月丁卯有事于太廟躋僖公逆祀也仲尼曰臧文仲其不仁者三不知者三下展禽廢六關妾織蒲三不仁也作虛器縱逆祀祀爰居三不知也五年秋楚滅六又滅蓼文仲聞六與蓼滅曰臯陶庭堅不祀忽諸德之不建民之無援哀哉孔子問於漆雕憑曰子事臧文仲武仲及孺子容此三大夫孰賢對曰臧氏家有守龜名曰蔡文仲三年而爲一兆武仲三年而爲二兆孺子容三年而爲三兆憑從此見之若問三人之賢與不賢所不敢識也孔子曰君子哉漆雕氏之子也其言人之美也隱而顯言人之過也微而著知如不能及明如不能見孰克如此

按春秋成公二年六月癸酉季孫行父臧孫許叔孫僑如公孫嬰齊帥師會晉卻克衛孫良夫曹公子首及齊侯戰于鞌齊師敗績

臧孫紇

按春秋臣傳臧孫紇字武仲宣叔之子也襄公十八年諸侯圍齊十九年伐齊季武子以所得於齊之兵作林鍾而銘魯功焉武仲曰非禮也夫銘天子令德諸侯言時計功大夫稱伐今稱伐則下等也計功則借人也言時則妨民多矣何以爲銘且夫大伐小取其所得以作彝器銘其功烈以示子孫昭明德而懲無禮也今將借人之力以救其死若之何銘之小國幸於大國而昭所獲焉以怒之亡之道也二十一年邾庶其以漆閭丘來奔季武子以公姑姊妻之皆有賜於其從者於是魯多盜季孫謂武仲曰子盍詰盜武仲曰不可詰也子召外盜而大禮焉何以止吾盜紇也聞之在上位者洒濯其心壹以待人軌度其信可明徵也而後可以治人夫上之所爲民之歸也上所不爲而民或爲之是以加刑罰焉而莫敢不懲若上之所爲而民亦爲之乃其所也又可禁乎季武子無適子公彌長而愛悼子欲立之訪于紇紇爲立悼子而以公彌爲馬正孟孫自是惡臧孫而季孫愛之及孟

孫卒臧孫入哭甚哀多涕出其御曰孟孫之惡子也而哀如是季孫若死其若之何臧孫曰季孫之愛我疾疢也孟孫之惡我藥石也美疢不如惡石夫石猶生我疢之美其毒滋多孟孫死吾亡無日矣孟氏閉門告於季孫曰臧氏將爲亂不使我葬臧孫聞之戒季孫怒命攻臧氏紇斬鹿門之關以出奔邾自邾如防使來告曰紇非敢私請苟守先祀無廢二勳敢不辟邑乃立臧爲臧紇致防而奔齊

臧賈 臧爲

按左傳襄公二十三年初臧宣叔娶於鑄生賈及爲而死繼室以其姪穆姜之姨子也生紇長於公宮姜氏愛之故立之臧賈臧爲出在鑄臧武仲自邾使告臧賈且致大蔡焉曰紇不佞失守宗祧敢告不弔紇之罪不及不祀子以大蔡納請其可賈曰是家之禍也非子之過也賈聞命矣再拜受龜使爲以納請遂自爲也臧孫如防使來告曰紇非能害也知不足也非敢私請苟守先祀無廢二勳敢不辟邑乃立臧爲臧紇致防而奔齊

按宣叔臧孫許諡也

臧昭伯 臧會

按左傳昭公二十五年初臧昭伯如晉臧會竊其寶龜僂句以下爲信與僭僭吉臧氏老將如晉問會請往昭伯問家故盡對及內子與母弟叔孫則不對再三問不對歸及郊會逆問又如初至次于外而察之皆無之執而戮之逸奔郕郕假使爲賈正焉計于季氏臧氏使五人以戈楯伏諸桐汝之閭會出逐之反奔執諸季氏中門之外平子怒曰何故以兵入吾門拘臧氏老季臧有惡及昭伯從公平子立臧會會曰僂句不余欺也

按昭伯臧爲子會昭伯從弟

臧賓如

按左傳哀公八年秋及齊平九月臧賓如如齊涖盟

按賓如會之子

臧石

按左傳哀公二十四年夏四月晉侯將伐齊使來乞師曰昔臧文仲以楚師伐齊取穀宣叔以晉師伐齊取汶陽寡君欲邀福于周公願乞靈于臧氏臧石帥師會之取廩丘軍吏令繕將進萊章曰君卑政暴往歲克敵今又勝都天幸多矣又焉能進是嚮言也役將班矣晉師乃還餽臧石牛太史謝之曰以寡君之在行牢禮不度敢展謝之

按石賓如之子

臧倉

按孟子疏臧倉魯平公愛幸之人

漢 臧荼

按漢書項籍傳籍分天下以王諸侯燕將臧荼從楚救趙因從入關立荼爲燕王

按漢五年荼反高祖自將征之擄荼

臧衍

按漢書盧綰傳陳豨反上如邯鄲擊豨綰亦擊其東北綰遣其臣張勝使匈奴故燕王臧荼子衍見勝曰燕所以久存者以諸侯數反兵連不決也今公爲燕欲急滅豨等豨等已盡次亦至燕公等亦且爲擄矣公何不令燕且緩豨勝以爲然還報綰

臧固

按漢書韓安國傳安國於梁舉壺遂臧固皆天下名士

臧洪

按漢書王莽傳太保屬臧鴻奏符命言扶風有雍石莽迎受之

後漢 臧宮

按後漢書臧宮傳宮字君翁潁川郊人也少爲縣亭長游徼後率賓客入下江兵中爲校尉因從光武征戰以爲偏將軍光武卽位以爲侍中騎都尉建武二年封成安侯明年將突騎與祭遵擊更始將左防韋顏於沮陽鄺悉降之三年將兵徇江夏擊代鄉鍾武竹里皆下之拜宮爲輔威將軍七年更封期思侯擊梁郡濟陰皆平之十一年拔綿竹破涪城滅公孫述帝以蜀新平拜宮爲廣漢太守十三年更封鄼侯十五年徵還京師以列侯奉朝請定封朗陵侯十八年拜大中大夫遷城門校尉復轉左中郎將宮以謹信質樸故常見任用永平元年卒諡曰愍侯子信嗣信卒子震嗣震卒子松嗣元初四年與母別居國除永寧元年鄧太后詔封松弟由爲朗陵侯

臧曼

按後漢書臧洪傳洪父曼有幹事才熹平元年會稽妖賊許昭起兵句章攻破城邑衆以萬數拜曼揚州刺史破平之遷曼爲使匈奴中郎將

臧洪

按後漢書臧洪傳洪字子源廣陵射陽人以父功拜童子郎知名太學洪體貌魁梧有異姿舉孝廉補卽丘長中平末棄官還家太守張超請爲功曹時董卓圖危社稷洪說誅除國賊爲天下倡義超然其言與洪西至陳留見兄邈計事邈引洪與語大異之乃與諸牧守大會酸棗設壇場盟時討鹵校尉公孫瓚與大司馬劉虞有隙超乃遣洪詣虞共謀其難行至河間而值幽冀交兵行途阻絕因寓於袁紹紹以洪領青州刺史任事二年袁紹憚其能徙爲東郡太守時曹操圍張超于雍丘甚危急洪聞乃徒跣號泣並勒所領將赴其難自以衆弱從紹請兵而紹竟不聽之超城遂陷張氏族滅洪由是怨紹絕不與通紹興兵圍之歷年不下城中糧盡外無援救城陷生執洪紹本愛洪意欲屈服赦之見其辭切知終不爲用乃命殺焉洪邑人陳容少爲諸生親慕於洪隨爲東郡丞先城未敗洪使歸紹時容在坐見洪當死起謂紹曰將軍舉大事欲爲天下除暴而專先誅忠義豈合天意紹慙容遂復見殺

魏 臧霸

按魏志臧霸傳霸字宣高泰山華人也父戒爲縣獄掾據法不聽太守欲所私殺太守大怒令收戒

詣府時送者百餘人霸年十八將客數十人徑於費西山中要奪之送者莫敢動因與父俱亡命東海由是以勇壯聞黃巾起霸從陶謙擊破之拜騎都尉太祖之討呂布也霸將兵助布既擒布霸自匿太祖募索得霸見而悅之以爲瑯邪相封都亭侯加威鹵將軍又與于禁討昌豨與夏侯淵討黃巾餘賊徐和等有功遷徐州刺史拜揚威將軍文帝卽王位遷鎮東將軍進爵武安鄉侯都督青州諸軍事及踐祚進封開陽侯徙封良成侯徵爲執金吾位特進每有軍事帝常咨訪焉薨諡曰威侯

臧艾

按魏志臧霸傳霸爵良成侯薨子艾嗣艾官至青州刺史少府艾薨諡曰恭侯子權嗣

晉 臧舜

按魏志臧霸傳註霸子舜字太伯晉散騎常侍才穎條暢識贊時宜

宋 臧燾

按宋書臧燾傳燾字德仁東莞莒人武敬皇后兄也少好學善三禮貧約自立操行爲鄉里所稱晉孝武帝太元中衛將軍謝安始立國學徐兗二州刺史謝元舉燾爲助教頃之去官以母老家貧棄

人事躬耕自業約已養親者十餘載父母喪亡居喪六年以毀瘠著稱服闋除臨沂令義旗建爲太學博士叅右將軍何無忌軍事隨府轉鎮南將軍高祖鎮京口叅高祖中軍軍事入補尙書度支郎改掌祠部襲封高陵侯遷通直郎高祖鎮軍車騎中軍太尉咨議叅軍高祖北伐關洛大司馬琅邪王同行除大司馬從事中郎總留府事義熙十四年除侍中元熙元年以脚疾去職高祖受命徵拜太常雖外戚貴顯而彌自沖約茅屋蔬飧不改其舊所得奉祿與親戚共之永初三年致仕拜光祿大夫其年卒

臧熹

按宋書臧質傳質父熹字義和武敬皇后弟也好經籍隆安初兵革屢起熹乃習騎射志在立功行叅高祖鎮軍事員外散騎侍郎重參鎮軍軍事領東海太守以義功封始興縣五等侯又叅高祖車騎中軍軍事以爲建威將軍臨海太守郡經兵寇百不存一熹綏緝綱紀招聚流散歸之者千餘家徵拜散騎常侍母憂去職頃之討劉毅起爲寧朔將軍從征事平高祖遣朱齡石統大衆伐蜀命熹奇兵出中水以本號領建平巴東二郡太守成都既平熹遇疾義熙九年卒於蜀郡牛脾縣

臧質

按宋書臧質傳質字含文東莞莒人少好鷹犬善搏博意錢之戲長六尺七寸出面露口禿頂拳髮高祖以爲世子中軍行參軍永初元年爲員外散騎侍郎母憂去職服闋爲江夏王義恭撫軍以輕薄無檢爲太祖所知徙爲給事中會稽宣長公主每爲之言乃出爲建平太守甚得蠻楚心南蠻校尉劉湛還朝稱爲良守遷寧遠將軍歷陽太守仍遷竟陵江夏內史復爲建武將軍巴東建平二郡太守徵爲使持節都督徐兗二州諸軍事寧遠將軍徐兗二州刺史在鎮奢費爵命無章爲有司所糾遇赦復爲建威將軍義興太守元嘉二十七年遷南譙王義宣司馬寧朔將軍南平內史未之職遷太子左衛率坐前伐蠻枉殺隊主嚴祖又納面首生口不以送臺免官魏侵徐豫拓跋燾率大眾向彭城以質爲輔國將軍率萬人北救燾解圍遁走上嘉質功以爲使持節監雍梁南北秦四州諸軍事冠軍將軍寧蠻校尉雍州刺史封開國子元凶弒立以質爲丹陽尹質家遣門生師顗報質具太祖崩問質疏顗所言馳告司空義宣又遣州祭酒從事田穎起銜命報世祖率衆討逆世祖至新亭卽位以質爲都督江州諸軍事車騎將軍開府儀同三司江州刺史加散騎常侍質率所領生禽

元凶封始興郡公時世祖自攬威柄而質以少主遇之是事事行多所欲及至尋陽刑政慶賞不復咨稟朝廷益口鉤折米輒散用之臺符屢加檢詰質漸猜懼便有異圖以義宣凡閭易可制勒欲外相推奉以成其志會議宣有憾于世祖質因此密信說誘陳朝廷得失又謂震主之威不可持久主相勢均事不兩立今專據閫外地勝兵強遲疑不決則後機致禍質女爲義宣子採妻謂質無復異同納其說且義宣心腹將佐蔡超民之徒咸有富貴之情願義宣得欲倚質威名以成其業又勸獎義宣義宣時未受丞相質子敦爲黃門侍郎奉詔敦勸道經尋陽質令敦具更譬說并言世祖短長義宣乃意定馳報豫州刺史魯爽期孝建元年秋同舉爽失旨卽便起兵遣人至京邑報弟瑜瑜席卷奔叛瑜弟弘爲質府佐世祖遣報質質於是執臺使狼狽舉兵世祖遣撫軍將軍柳元景統豫州刺史王元謨等水車屯梁山待之質至梁山與義宣攻城元謨留羸弱守城悉精兵出戰賊大潰義宣出走質不知所爲亦走衆悉降散質入南湖逃竄無食摘蓮噉之追兵至窘急以荷覆頭自沈於水出鼻軍主鄭俱兒望見射之中心兵刃亂至腸胃纏縈水草隊主裴應斬質首傳京都

按宋書臧燾傳燾子寔護軍司馬宜都太守

臧綽

按宋書臧燾傳燾子綽太子中舍人新安太守

臧謚之

按宋書臧燾傳燾子寔寔子謚之尚書都官郎烏程令

臧凝之

按宋書臧燾傳謚之弟凝之學涉有當世才具歷隨王誕後軍記室錄事遷尚書右丞以徐湛之黨爲元凶所殺

臧潭之

按宋書臧燾傳凝之弟潭之有美譽太宗世歷尚書吏部郎御史中丞後廢帝元徽中爲左民尚書

卒官

臧澄之

按宋書臧燾傳潭之弟澄之太子左積弩將軍元嘉二十七年領軍於盱眙爲魏人所破見殺

臧煥

按宋書臧燾傳燾子綽綽子煥順帝昇明中爲武昌太寺沈攸之攻郢城煥棄郡赴之攸之敗伏誅

臧賁

按宋書臧燾傳燾子寔寔子凝之子賁尙書主客郎徐羨之征西功曹爲沈攸之盡節

臧奉先

按南齊書臧榮緒傳榮緒祖奉先建陵令

臧唐民

按南齊書臧榮緒傳榮緒父唐民國子助教

南齊 臧榮緒

按南齊書臧榮緒傳榮緒東莞莒人幼孤躬自灌園以供祭祀隱居京口教授南徐州辟西曹舉秀才不就太祖爲揚州徵榮緒爲主簿不到自號被褐先先永明六年卒